



Entre a inercia e o cambio

Crónica na encrucillada galega

Xosé Luís Barreiro Rivas

1. Todo se transforma e flúe

Vistos en frío, sen pensar neles, os vinte e cinco anos que cumpre a revista *Encrucillada* non son máis que a 80,08ava parte do tempo transcorrido dende o nacemento de Cristo. Pero a pouco que nos paremos a ollar a súa transcendencia, conscientes da realidade galega na que vivimos, o cuarto de século que nos separa do número un desta revista é o que viu a conquista e proclamación da Constitución Española que nos liberou de corenta anos de ditadura, o nacemento do Estatuto e das institucións de Goberno que definen e fan posible a Autonomía de Galicia, o fin da Guerra Fría e o derrube do socialismo real, a entrada de España na Unión Europea, o fin da peseta e o nacemento do euro, a revolución informática, a globalización da economía e o comezo dunha nova orde mundial que ven substituír a que xurdira en Westfalia.

Nestes vinte e cinco anos houbo tamén enormes cambios na concepción da vida relixiosa, que tanto serven para ollar con preocupación para o fundamentalismo musulmán ou para contemplar con sorpresa a restauración da Igrexa Ortodoxa Rusa, pero que en todo caso nos avisa dun crecente sincretismo relixioso que pon en crise as institucións relixiosas de todo o mundo, e que, no ámbito específico da Igrexa Católica parece profetizar un cambio case revolucionario e inminente que o pontificado de Xoan Pablo II non fixo máis que disimular e retardar, acumulando sobre nós unha enerxía revisora de consecuencias impredecibles.